

Visoki predstavnik apeluje na Predsjedništvo da odobri strukturu Oružanih snaga BiH

Visoki predstavnik Christian Schwarz-Schilling apelovao je na Predsjedništvo BiH da odobri predloženu odluku o veličini, strukturi i stacioniranju Oružanih snaga BiH (OSBiH) do zakonom predviđenog roka.

Visoki predstavnik se obratio Predsjedništvu ovim apelom nakon što je predsjedavao sastankom ambasadora Upravnog odbora Vijeća za implementaciju mira, na kome se razgovaralo o ovom pitanju.

“Hitno je potrebno da Predsjedništvo, u svojstvu kolektivnog zapovjednika, postigne dogovor o ovim pitanjima,” rekao je visoki predstavnik. “U Zakonu o odbrani utvrđen je rok, i ukoliko se on propusti, postoji opasnost da će to odložiti provedbu ključnih vojnih reformi.”

U Zakonu o odbrani, koji je stupio na snagu 28. decembra 2005., kao rok da Predsjedništvo postigne dogovor o veličini, strukturi i stacioniranju OSBiH utvrđen je 1. juli.

Predloženu odluku o veličini, strukturi i stacioniranju OSBiH izradio je ministar odbrane BiH Nikola Radovanović i njegov tim za tranziciju, pri čemu je NATO imao savjetodavnu ulogu.

Upravni odbor Vijeća za implementaciju mira konkretno se pozabavio ovim pitanjem na svom sastanku održanom prošle sedmice, izrazivši u svom komunikeu nadu da će se “odluka donijeti prije 1. jula i da će biti u skladu sa zakonom i preduvjetima da snage budu jedinstvene i kompatibilne sa NATO-m”.